

Per l'annada giubilara digl Ischi

Autor(en): **Vonderach, Johannes**

Objekttyp: **Preface**

Zeitschrift: **Igl Ischi : organ della Romania (Societat de Students Romontschs)**

Band (Jahr): **50 (1964)**

PDF erstellt am: **27.05.2024**

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Ein Dienst der *ETH-Bibliothek*

ETH Zürich, Rämistrasse 101, 8092 Zürich, Schweiz, www.library.ethz.ch

<http://www.e-periodica.ch>

Per l'annada giubilara digl Ischi

Caspar Decurtins, il grond fegl dil Grischun romontsch, ha scret ina gada en in studi litterar: «Tuts ils tschentaners d'ina naziun ein feglia d'in cudisch ed ils vers umens dil progress ein quels che van egl avegnir cun il respect il pli profund dil passau». Decurtins sez ei staus nundispitezivlamein in ver um dil progress. Ins considereschi ses sforzs e siu success sil camp social; ins uardi sin ses merets eminents per la fundaziun della universitat de Friburg; ins patratgi agl impuls decisiv ch'el ha dau alla renaschientsha romontsch a. e. a. v. Decurtins era denton ragischaus sco paucs el passau e penetraus d'in profund respect per quei ch'ils tschentaners vargai han creau e transmess alla generaziun viventa. Siu continuau studi dell'istoria culturala muossa quei fetg bein; quei attestan era sias numerusas lavurs sur la tradiziun orala e la litteratura romontsch ch'el ha rimnau sia veta ora e fatg accessibla al mund scientific; de quei ei era igl «Ischi» perdetga, ch'el ha fundau e redigi otg onns.

Igl Ischi compara uonn per la 50 avla gada. Nus exprimin agl organ giubilar della Romania nos sincers auguris.

Igl Ischi ei staus neu e neu in annuari dedicaus al patrimoni cultural retic-romontsch. Quei patrimoni ei respectabels, gie surprendents ed igl Ischi ha contribuiu ina buna part leutier che la cultura indigena, la litteratura sursilvana, l'istoria locala ein vegni pli enconuschents. Ils fretgs de studi deponi egl Ischi sut l'egida de habels redacturs: Caspar Decurtins, Pieder Tuor, Raymund Vieli, Giusep Demont, Guglielm Gadola ed Alfons Maissen leventan stema e carschentan igl anim per ils beins spirtals dil pievel romontsch.

Dasperas ha igl Ischi dau plaz ad ovras litteraras e belle-tristicas ed aschia promoviu il svilup della litteratura nova. Meinsvart ha el era tractau damondas actualas dil pievel.

Igl ei ca necessari de menzionar che l'apprezzaziun digl agen ed il saver co autras generaziuns han patertgau ei oz enzatgei pli basigneivel che zacu. Las midadas secularas che la tecnica porta e l'enorma influenza d'ordeifer sragischeschan il carstgaun.

Tgunsch portan ellas en aquella in cal de suc vital, in prighel de digren. Il svilup duei denton menar a ver progress e buca muntar in regress. Il Secund Concil Vatican che va alla fin cheu a Ruma en quendisch dis ei in bien muossavia: el segna ina viulta per l'entira Baselgia, in'avischinaziun al mund niev; ina viulta ed avischinaziun denton che ignoreschan buca la tradiziun e sias fontaunas, mobein tuornan anavos tier ellas.

Cun plascher constatein nus adina puspei che la cultura romontscha ei formada eminentamein, gie decisivamein da nossa religiun. Quei caracter religius della cultura romontscha ha ual nies antecessur, Monsignur Uestg Cristianus Caminada de pia memoria, explicau cun tut agen dun, buca il davos ellas lavurs ch'el ha publicau a sias uras egl Ischi. Nus sperein che igl Ischi porti era egl avegnir tals studis. La religiun ha impurtonza fundamentala per la cultura insumma. Ei sedi che l'olma della cultura ei la cultura dell'olma; nus mettein vitier: la vera cultura dell'olma ei la cardientscha.

Ruma, ils 25 de november 1965

+ Joannes,
Uestg de Cüra.